

A POLISTENA

Polistena mi pari 'na riggina
Seduta 'ntra nu tronu d'olivari,
Lu sulì chi tt'abbasa la matina
Ti gira e poi si jetta 'ntra lu mari.

'Nu mari chi si pigghia cu li mani,
cu nn'acqua chi nui sulì possedimu,
guardando 'ntra li tempi e ppè li chiani
lu Stròmboli ti pari cchiù vicinu.

Nesciru 'ntra li casi di 'na vota,
cu vecchi ceramidi cumbogghiati,
li figghi meritevoli di nota,
pe' ricchezza di 'ngegnu menzionati.

Cannata, Scerbu , Rodinò-Tuscanu,
Morani, Marafioti e Valenzisi,
Jeraci chi di marmu cu la manu fici stàtù parlanti a li pajisi.

E nno pe nmenti nominàmmu a ccasu
Parlatu e Niglia, e Filipu u dottùri
Chi ti caccia li mali di lu nasu
E ddi la gula sana tutti li dolùri.

Avisti puru, comu Carcaterra,
giudici onesti, prèviti e prelati
chi vittaru la luci 'ntra ssa terra,
chi onùrau lu locu undi su' nnati.

Chi figgi chi spuntàru a ssu pajisi!
Burgisi, li Tigani e Raguseu
E ttanti e ttanti chi nno sugnu misi
Pecchè no vennu a lu penzèru meu.

Rigùgghiu fusti di 'na maestranza :
forgiàri, falignàmi e custureri ,
parrèra mu ti chiamanu è l'usanza
di 'ngegni tantu nòbuli e sinceri.

Pe' stemma nd'ài 'na turri smerlettata,
'na cerza chi a la forza t'abbicina,
si'ddi lu jerapòtamu vagnata,
mu ti proteggi nc'è santa Marina.

Chi mmeravigghia chidha to' affacciata
Chi decantàu lu sindacu Manfrè,
" Chianu da' Trinità " veni chiamata,
vista cchiù bedha a nnuda vanda nc'è!

Quantu cunsùlu è verzu tia tornàri
a ccui ti fu luntanu pe tant'anni,
pari 'nu sonnu... si torna contrari,
scumpàrinu li peni cu l'affanni!...

Francesco Laruffa